

Diuqgyangndoi Gimcou

□ Maj Veiyungz comz hoiz



▲ Foux diuqgyangndoi diuq haeuj ndaw gunghvenz.



▲ Yiengh foux lumj yiengh vehdat Byaraiz.



▲ Foux diuqgyangndoi Gimcou.



▲ Foux diuqgyangndoi Lingzsan.

Diuqgyangndoi, youh heuh cietgyangndoi, dwg Gimnamz Gih, Gimbaek Gih, Lingzsan Yen caeuq Bujbwz Yen aen ciet Mbanjcuengh, Mbanjgun hunghoengh ndeu. Gij lizsij de daengz seizneix gaenq miz 470 lai bi. De daj vwnzva Yahnoz daeuj, youq lajmbanj dwg cungj hozdung caeqbaiq ndeu, daep mauhngge gyaep fangz cawz binghra. Ceiq caeux dwg raen Mingzciuz Gyahging《Gimcou Ceiq》bien “Fungsug” geiq: “Ndwenbet cibngux, ciq gij mingz neix dajcaeq, youq gyangndoi cang guh fangzsien diuqfoux, couh heuhguh diuqgyangndoi, bouxsai mehmbwk cungj bae humxyawj, doiqfwen.” Nanz le, diuqgyangndoi couh daj aen yizsiz caeqbaiq gyo’ mbaiq bouxsien bienqbaenz biengzdieg aen vwnzva guh’ angq hozdung seizneix.

Moix bi liggaeuq ndwenbet daengz ndwencib, gak aen Mbanjcuengh, Mbanjgun diegde cungj doxlwnz gvaq cietgyangndoi, bae-dauq aiq gvaq baenz sam ndwen lai, guh lai mbat le couh baenz gvenq lo, vihneix youh heuh “laehboizbi”. Seizde ranzranz hohhoh cungj gaj gaeq gaj bit, gaj mou gaj vaiz, baij laeuj daih hek, noix cix song sam daiz, lai cix bet daiz cib daiz, caiqlj geijcib daiz cungj miz. Ndawde, diuqgyangndoi dwg aen

hozdung dajcaeq ceiq youqgaen haenx, dwg vihliux gyaepcawz yak-rwix, mbaenjgouz gomiuz maj ndei sou lai, bouxvunz doenghduz cungj bingzan. Caiqlj cungj youq gwnz ndoi henz Miuhdoidaih banh hozdung, ndigah couh heuh “diuqgyangndoi”. Banhaemh, goeng-daeuz naj daep mauhngge Noz, ndang daenj buhgob diuq foux ciengq go, cingj goengcoj guhcawj, sou deuz iucing iugvaiq seiqhenz. Doeklaeng, canghheiq biujyienj doenghgij foux “mbe daihhoengz” “diuq samsae” “diuq goengsae” “diuq bouxcienq cungcig” “lienb bing” “diuq seiqcieng” “bau laefwj” “diuq yahsien” daengj. Itbuen daj mbwnlaep yienj daengz ngoenz daihngaih ranzrongh bae.

Gij daegdiemj diuqgyangndoi dwg ciengq go couh mbouj diuq foux, diuq foux couh mbouj ciengq go, miz gij foux cingq haenx, hix miz buenq doeg buenq ciengq bae langhbaiz cingzciet gojgaeq. Giek mbouj doengz, canghheiq couh daenj gij ndangdaenj caeuq daep mauhngge mizgven haenx, diuz foux ndeu diuq sat, canghfwen couh ciengq gij gojgaeq mizgven haenx. Ndawde, mauhngge Noz dwg aen hongdawz yienjheiq ceiq lai ndeu. Couhdwg aeu gij yienghsiengq caeuq cangndang mbouj doengz

haenx bae langhbaiz gij singqheiq bouxvunz, lumjbaenz yakdoeg, yiemzhaeng, dasang, ganvad, cingcig, unqswnh daengj. Gij yozgi cujyau dwg laz, gyong, nauz, lij miz hauh gaeuvaiz daengj. Gyoengqde cang vunz ndaw heiq cang ndaej sengdoengh miz saenz, gangjavah hix loenghriu mizyinx, yinx bouxyawj cungj got dungx riuhaha. Ngoenz daihngaih gyanghaet couh diuq gij foux “soucing” “gyaep ruzlungz”, eiqsei naeuz dawz gij cinggvaiq daiq miz yakrwix, binghra haenx sou haeuj ndaw ruzlungz aeu ceij biuj haenx bae, soengq daengz henz dah le youh aeu feiz coemhcag, dawz gij daeuh vanq haeuj ndaw dah bae, eiqsei dwg dajneix rengxdumh couh riengz raemxdah ruz deuz lo, yienh’ok gyoengq-vunz maqmuengh saedceij aeu maz ndaej maz, biengzbing an’ onj. Yienghneix, aen hozdung diuqgyangndoi couh guh sat lo.

Diuqgyangndoi daj ndaw vwnzva Bouxcuengh bonjdeih bienq daeuj, seiz riuzcienz gij cietheiq vwnzva Bouxgun youh baez di baez di gya haeujdaej, siengcwng minzcuiz doxgiet baenaj. Bi 2014, diuqgyangndoi Gimcou ndaej senj haeuj guekgya gaep buek daihseiq feihvuzciz vwnzva yizcanj hanghmoeg mingzloeg.



▲ Canghheiq diuqgyangndoi Bubaek son lwgsae lienh diuq.



▲ Roq gyong roq lai buenx diuqgyangndoi.



▲ Canghheiq yienj “diuq samsae”.



▲ Foux “diuq yahsien”.